



Mizan – vaga djela na Sudnjem danu (Meka)

Hatib: dr. Fejsal ibn Džemil Gazavi

16. safer 1445. po Hidžri / 1. septembar 2023.

Hvala Allahu Koji će sakupiti ljude na Dan u koji nema nikakve sumnje: “Allah, zaista, sve može” (El-Bekara, 20); “Stvoriti sve vas i sve vas oživiti isto je kao stvoriti i oživiti jednoga čovjeka; Allah, zaista, sve čuje i sve vidi” (Lukman, 28). Svjedočim da nema boga osim Allaha, jedinog, Koji nema druga, On je Blagi i Sveznajući, i svjedočim da je Muhammed, sallallahu alejhi ve sellem, Njegov rob i poslanik, koji je došao sa radosnom viješću i opomenom, neka su na njega Allahova milost, blagoslov i spas, i na njegovu porodicu i ashabe.

Bojte se Allaha, budite svjesni Njegovog nadzora, “znajte da ćete pred Njega stati” (El-Bekara, 223), radite za Vječnu kuću, dajte prednost vječnom nad prolaznim, i neka vas prolazni svijet ne odvрати od vječnog.

O muslimani, jedan od veličanstvenih prizora Sudnjeg dana i stvari iz domena nevidljivog – gajba, koje su potvrđene vjerodostojnim šerijatskim tekstovima jeste mizan – vaga, kojom će se mjeriti ljudska djela.

Uzvišeni kaže: “Mi ćemo na Sudnjem danu ispravne terazije postaviti, pa se nikome krivo neće učiniti; ako nešto bude teško koliko zrno gorušice, Mi ćemo za to kazniti ili nagraditi. A dosta je to što ćemo Mi račune ispitivati.” (El-Enbija, 47)

“Mjerenje toga dana bit će pravedno: oni čija dobra djela prevagnu, oni će šta žele postići; a oni čija dobra djela budu lahka, oni će, zato što dokaze Naše nisu priznavali, stradati.” (El-A’raf, 8–9)

“Onaj u koga njegova djela budu teška – u ugodnu životu će živjeti, a onaj u koga njegova djela budu lahka – boravište će mu bezdan biti. A znaš li ti šta će to biti? – Vatra užarena!” (El-Karia, 6–11)





Navedeni ajeti govore nam da je mizan precizna vaga, koja neće ni povećati ni umanjiti čovjekova djela, i da će ljudi, na osnovu njenog mjerenja, biti klasificirani u dvije skupine: spašeni, koji će biti u džennetima u kojima će vječno uživati; i propali, koji će biti stanovnici Džehennema.

Poštovani vjernici, ova vaga koja će biti postavljena na Sudnjem danu je stvarna, imat će dva tasa, i njenu veličinu ne zna niko osim Allaha.

Šerijatski tekstovi ukazuju na to da će na Sudnjem danu biti vagana ljudska djela, oni sami i knjige njihovih djela.

Vaganje ljudskih djela potvrđuju riječi Poslanika, sallallahu alejhi ve sellem: "Dvije rečenice drage su Milostivom, lahke na jeziku, teške na mizanu: Subhanallahi ve bi hamdihi, subhanallahil-azim!"

Vaganje ljudi, shodno njihovom vjerovanju, potvrđuju riječi Poslanika, sallallahu alejhi ve sellem: "Na Sudnjem danu doći će velik i debeo čovjek, koji kod Allaha neće težiti ni koliko je krilo mušice, čitajte: 'i na Sudnjem danu im nikakva značaja nećemo dati' (El-Kahf, 105)." Nasuprot njima, poštovani vjernici, doći će čovjek slabe fizičke konstitucije a jakog vjerovanja, i on će težiti koliko jedno brdo. Prenosi se za Ibn Mesuda, radijallahu anhu, da je imao mršave potkoljenice, i da ga je vjetar obarao, zbog čega su mu se ljudi smijali. Allahov Poslanik, sallallahu alejhi ve sellem, upitao ih je: "Zašto se smijete?" "Zbog mršavosti njegovih potkoljenica", odgovoriše oni, a Poslanik, sallallahu alejhi ve sellem, reče im: "Tako mi Onoga u Čijoj je ruci moja duša, njegove potkoljenice bit će teže na vagi od brda Uhud."

Dokaz da će knjige djela također biti vagane jesu riječi Poslanika, sallallahu alejhi ve sellem: "Na Sudnjem danu, Allah, džellešanuhu, izdvojit će jednog čovjeka iz mog ummeta, naočigled svih ljudi, a zatim će mu, kao svjedočanstvo protiv njega, izlistati 99 registara, veličina samo jednog od njih je dokle pogled dopire. Bit će upitan: 'Poričeš li nešto od ovoga što je u registrima i da li su ti Moji povjerljivi pisari kakvu nepravdu učinili?' Čovjek će odgovoriti: 'Ne, Gospodaru moj.' 'A imaš li opravdanje ili neko dobro djelo?' Čovjek će se zbuniti i reći: 'Ne, Gospodaru moj.' Reći će:





‘Naprotiv, ti kod Nas imaš jedno dobro djelo i danas ti se neće učiniti nepravda.’ Tada će mu se pokazati listić na kome piše: ‘Ešhedu en la ilahe illallah ve ešhedu enne Muhammeden resulullah’, i bit će rečeno: ‘Stavite ga na vagu!’ Čovjek će reći: ‘Gospodaru moj, šta je ovaj listić u odnosu na ovolike registre?’ Reći će: ‘Tebi se, zaista, neće nepravda učiniti.’ Registri će se staviti na jedan, a onaj listić na drugi tas vage, pa će listić pretegnuti i biti teži od svih 99 registara’, a potom reče: ‘Ništa nije teže od Allahovog imena.’”

O vjernici, nakon što smo upoznali ove činjenice u vezi sa mizanom, preostaje nam da se dobro zamislimo nad svojim djelima koja će biti vagana na mizanu. Da li smo zaista ubijeđeni da će naše dobro i zlo, dobra i loša djela biti stavljena na ovu preciznu i veličanstvenu vagu? U tom smislu, prenosi se od Omera ibn Hattaba, radijallahu anhu, da je rekao: “Obračunajte svoje duše prije nego što budete polagali račun, izvagajte svoja djela prije nego što budu vagana. Lakše ćete položiti račun sutra, na Sudnjem danu, ako obračunate svoje duše danas. I spremite se za Dan velikog ispitivanja. ‘Tada će ispitivani biti, i nijedna tajna vaša neće sakrivena ostati’ (El-Hakka, 18).”

Ebul-Ahves, Allah mu se smilovao, rekao je: “Znaš li od čega treba najviše strahovati? Ako čovjekova dobra djela pretegnu, bit će prozvan pred skupom, na kojem će biti i oni prvi i potonji: ‘Ovaj čovjek je postigao sreću nakon koje više nikada neće biti nesretan’, a ako pretegnu njegova loša djela, bit će prozvan pred svim stvorenjima: ‘Ovog čovjeka zadesila je nesreća, nakon koje više nikada neće biti sretan.’”

Poštovani vjernici, samo jedan čovjek može snagom svoga vjerovanja, dobrotom, bogobojaznošću i djelima i onim što se učvrstilo u njegovom srcu postići takav stepen i veličinu da bude veći od jednog čitavog ummeta.

Islamski ummet ima svoju težinu, vrijednost i poziciju, a neki njegovi pojedinci i velikani vrijede kao čitav ummet, kao što je Ebu Bekr es-Siddik, radijallahu anhu, za koga je Omer ibn Hattab, radijallahu anhu, rekao: “Kada bi se izvagao iman Ebu Bekra i iman svih ostalih ljudi, pretegnuo bi iman Ebu Bekra.” On je čovjek koji vrijedi kao cijeli ummet, jer je pokazao odlučnost u najtežim situacijama. Allah je





preko njega uzvisio, pomogao i učvrstio vjeru. Na dan Poslanikove smrti, on se uspeo na minber i rekao: "Ko je od vas obožavao Muhammeda, sallallahu alejhi ve sellem, neka zna da je Muhammed umro, a ko je obožavao Allaha, neka zna da je Allah živ i da ne umire." Ove njegove riječi vratile su ummet na pravi put nekon što ga je pogodila velika tragedija, smrt Vjerovjesnika, sallallahu alejhi ve sellem.

Islam vaga ljude vagom istine, prema njihovom karakteru, i uzdiže ih shodno njihovom vjerovanju, načelima, vrijednostima i ponašanju.

Čovjekova sloboda ogleda se u njegovoj potpunoj predanosti Gospodaru, a osnovni kriterij vrednovanja ljudi je bogobožnost, iman i dobro djelo.

Uzvišeni kaže: "One koji vjeruju i čine dobra djela Gospodar njihov će na pravome putu podržati, zato što vjeruju; rijeke će teći ispred njih u džennetima zadovoljstva." (Junus, 9)

Svako od nas treba se truditi da njegova vaga, tas dobrih djela, bude što teža na Sudnjem danu. Poslanik, sallallahu alejhi ve sellem, kada je lijegao u postelju, govorio je: "U ime Allaha spustio sam svoj bok. Allahu moj, oprosti mi grijeha, ponizi mog šejtana, oslobodi me okova grijeha i duga, ojačaj moju vagu i uvedi me u najbolje društvo." Neki učenjaci kazali su da je ova dova jedna od najvrednijih i najobuhvatnijih dova, koja je objedinila u sebi dobro ovog i budućeg svijeta, i zato je preporučeno da se uči svaku noć prije spavanja.

Također, čovjek treba činiti što više djela koja će ojačati njegovu vagu, a jedno od tih djela je lijepo ponašanje, na osnovu riječi Poslanika, sallallahu alejhi ve sellem: "Na vagi na Sudnjem danu neće biti ništa teže od lijepog ponašanja." U drugom hadisu kaže se: "Dvije rečenice su lahke na jeziku, teške na mizanu: 'Subhanallahi ve bi hamdihi subhanallahil-azim!'" Poslanik, sallallahu alejhi ve sellem, također je rekao: "Riječi elhamdulillah ispunjavaju vagu."

Ovi hadisi ukazuju na to da postoje dobra djela koja će pretegnuti na čovjekovoj vagi na Sudnjem danu, a najveće od tih djela su riječi tevhida, svjedočenje da nema





istinskog boga osim Allaha i da je Muhammed, sallallahu alejhi ve sellem, Allahov poslanik, kao što se navodi u poznatom hadisu o "cedulji".

O ljudi, izvršavajte Allahove naredbe, radite ono čime je On zadovoljan, činite dobro i vidjet ćete rezultat. Selman el-Farisi, radijallahu anhu, rekao je: "Namaz je vaga, ko u potpunosti ispuni obavezu namaza, dat će mu se potpuna nagrada, a onaj ko zakine, znate šta je Allah rekao za one koji zakidaju na vagi." (A Uzvišeni je rekao: "Teško onima koji na vagi zakidaju", aura El-Mutaffifin, 1.)

Vjerovanje u mizan, vagu, ima mnogobrojne plodove, kao što su:

- uspostavljanje dokaza protiv ljudi i pokazivanje Allahove pravde i da On neće učiniti nepravdu ni koliko jednu zehru;
- radost za vjernike kada vide radosne vijesti prije ulaska u Džennet;
- lakše podnošenje nedaća kroz koje prolazi mazlum – onaj kome je učinjena nepravda na ovom svijetu, znajući da će Allah na Sudnjem danu ispraviti nepravdu koja mu je učinjena i kazniti one koji su mu to nepravdu učinili;
- ustrajnost čovjeka na pravom putu, jer zna da će stati pred Allaha radi polaganja računa na Sudnjem danu, to ga podstiče da vodi računa o svojim djelima, i da požuri sa činjenjem dobra i ostavljanjem grijeha u osamljenosti.

Donosite salavate i selame na najbolje Allahovo stvorenje, kao što vam je naredio vaš Gospodar: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Molim Allaha da i meni i vama podari blagoslov u časnom Kur'anu, i da podari da nam koriste njegovi ajeti i mudra opomena. Rekoh ovo i od Uzvišenog Allaha tražim oprost za sebe, za vas i sve muslimane od svakog grijeha, a tražite i vi, On mnogo prašta i On je milostiv.

